

MJEKIMI KIRURGJIKAL I DY RASTEVE TË SHURDHUAR PAS POLITRAUMËS

— DILAVER BAJRAMI — SHKËLQIM KUSHOVA —

(Instituti Kërkimor i Mjekësisë Ushtarake)

Në politraumat janë të njohura, veç të tjerash, edhe shkëputjet traumatike të zinxhirit kockor, të cilat japin shurdhësi konduktive të menjëhershme. Zhvillimi i industrisë, i komunikacionit dhe mekanizimi i ekonomisë në përgjithësi rrisin mundësinë për shtimin e shurdhësive pastraumatike, të cilat, në situata lufte, parashikohet të jenë më masive. Prandaj lind e nevojshme që këto raste të njihen e të trajtohen në mënyrë të specializuar.

Rasti i parë. I sëmuri S.B., 22 vjeç, shtrohet në institutin tonë me diagnozën: ulje e rëndë transmesive e dëgjimit në veshin e djathtë. Midis të tjerash, në anamnezë jep këto të dhëna: para dy vjetësh pëson aksident automobilistik dhe shtrohet urgjent në spitalin e rrethit të tij, — ku qëndron 57 ditë, — me diagnozën kontuzion trunor, thyerje e bacinit. Prej asaj kohe nuk dëgjon më nga veshi i djathtë.

Pasi iu bënë ekzaminimet përkattëse, si dhe audiograma, që jepte rënie të transmetimit ajror deri në 65 db, u vendos diagnoza: ulje e dëgjimit transmesive pastraumatike (Fig. nr. 1).

Pas përgatitjes, futet në operim, duke iu bërë timpanotomi eksplorative nën mikroskop. Hapet zgavra timpanike dhe vihet re ndërprerje e zinxhirit kockor, sepse inkusi (kudhra) ishte krejt i shkatërruar. Kockëza e mesit pothuajse ishte dërrmuar fare dhe, në këto kushte, na u desh të rivendosnim përcueshmërinë. Në këtë rast vepruam kështu: morëm manubrium malci (doreza e çekiçit), e shkollitëm me shumë kujdes nga daullja e veshit, sepse, siç dihet, kjo e fundit është e hollë dhe delikate dhe mund të grisët gjatë manipulimit. Nga ky moment varet shumë edhe suksesi i mëtejshëm i operimit. Doreza e çekiçit, tanimë e çliruar nga membrana e timpanit, rrotullohet, duke e fiksuar midis dy këmbëzave të yzengjisë. Prej këtij momenti, i sëmuri fillon të dëgjojë më mirë. Në audiogramën që iu bë 12 ditë pas operimit u pa një përfitim maksimal audiometrik (Fig. nr. 2).

Rasti i dytë. I sëmuri G.Gj., 21 vjeç, shtrohet me të njëjtën diagnozë si i pari. Në anamnezë referon se para një viti e gjysmë rrëzohet nga kati i dytë dhe shtrohet në spital me diagnozën: komocion trunor, thyerje e anësive. Që nga ajo kohë, humbet dëgjimin nga njëri vesh. Gjatë kohës që kryen shërbimin ushtarak, paraqitet për vizitë, duke

u ankuar se nuk dëgjon pothuaj fare nga njëri vesh. Pasi iu bëmë audiogramën dhe provat kamertonale ambulatorisht, shtrohet në spital, në repartin ORL (Fig. nr. 3).

Në operimin, që iu bë po nën mikroskop, pasi hapet zgavra timpanike, vihet re edhe këtu ndërprerje e zinxhirit të kockave të dëgjimit në nivelin e artikulimit stapedoinkuidian. Merret procesi lentikular i inkusit, i cili ishte i larguar dhe, pasi çlirohet nga ngjitjet, afrohet te koka e stapestit, ku ngjitet me pika histakrili. Gjatë ndërhyrjes, çlirohet gjithë zinxhiri kockor nga ngjitjet dhe pllakat timpano-sklerotike, që ndodheshin rreth dritarezës ovale dhe yzengjisë. Kështu zinxhiri kockor bëhet i lëvizshëm. Edhe në këtë rast kemi rikthim të dëgjimit. Kjo u evitua edhe nga audiograma që iu bë pas operimit ku pati përfitim rreth 25 db (Fig. nr. 4).

Dy rastet që përshkruam më lart janë ndjekur nga ana jonë me audiometri dhe pas 6 muajsh. Është vënë re se dëgjimi ka ardhur duke u përmirësuar.

Si përfundim, mund të themi se: dëmtimet e trurit, të gjoksit apo të barkut të një i politraumizuar mund të jenë aq të rënda, saqë dëmmimi i organeve të dëgjimit mbetet jashtë interesit jetësor në momentet e para të ngjarjes. Por mjekut i del për detyrë të evidentojë rastet e politraumizuar që shoqërohen edhe me humbje të dëgjimit.

Duke iu referuar edhe literaturës bashkëkohore, është vënë re se në politrauma jo rrallë kemi humbje të dëgjimit, si pasojë e shkoputjes traumatike të zinxhirit kockor.

Futja në përdorim e mikroskopit kirurgjikal ka zgjeruar gamën e ndërhyrjeve rikonstruktive të veshit të mesëm. Kështu, të sëmurëve që kanë humbur dëgjimin pas traumave apo otiteve kronike të qelbëzuara, në pjesën më të madhe të tyre, ka mundësi t'u rikthehet dëgjimi dhe të riaftësohen.

Dorëzuar në redaksi më 9.10.1986

BIBLIOGRAFIA

- 1) Ballantyne I., Groves I.: Diseases of the ear, nose and throat, 1979, 2, 165.
- 2) Boçka A.: Mjekimi kirurgjikal i otoskleroës, Tiranë, 1980, 43.
- 3) Portman G.: Traité de technique opératoire ORL, Paris, 1962, 354.

Summary

SURGICAL TREATMENT OF TWO CASES OF DEAFNESS FOLLOWING MULTIPLE TRAUMAS

Two cases of profound traumatic loss of hearing are analysed. In both cases the explorative tympanotomy under microscope revealed the rupture of the chain of ear ossicles. After surgical reestablishment of the bone sound conduction both patients recovered a considerable degree of their hearing.

Résumé

TRAITEMENT CHIRURGICAL DE DEUX MALADES ATTEINTS D'UNE SURDITE POST-TRAUMATIQUE

Les auteurs ont étudié les résultats post-opératoires chez deux malades qui présentaient une baisse considérable de la transmission auditive après un traumatisme. La tympanotomie explorative sous-microscope a mis en évidence une discontinuité des os responsable de l'audition. Après l'intervention on a constaté une amélioration considérable des troubles de l'audition.